

四庫全書

集部

欽定四庫全書

集部

學古緒言卷十三至五

詳校官監察御史_臣曹錫寶

侍讀_臣孫球覆勘

總校官知縣_臣繆琪

校對官中書_臣吳俊

謄錄監生_臣張信

欽定四庫全書

學古緒言卷十三

明 婁堅 撰

祭文十三首

祭徐大宗伯文

年月日門下通家子婁某沈某謹以兕觥絮酒敬祭于
故資政大夫禮部尚書太子少保徐公之靈嗚呼單閼
之歲公壽七旬距其懸車八閏冬春於時獻頌自遠來

臻焜燿厥詞紛紛綸綸凡公勛名巨細畢陳今之哭公
畧而不論感公深眷憤彼衆信存歿之懷能不少伸當
罷觀察健翮中鍛賁于丘園振宣文物稚愚而頑一見
心折悉索穢蕪喜為摘舐身退名高俄復脂轄聖神嗣
興起公藩臬十餘年間晉司喉舌抗疏乞身不受汙蟻
迨歸里門遂斷請謁為方外遊黃冠白髮月明之宵花
發之朝或乘籃輦或棹輕舸顧謂童子促具酒肴偕我
同人于焉逍遙二三俊少每每見招侑以清歌有顏若

茗酒既深只醉客羣囂公或愀然叙說勤勞曰此畏途
以笑為刀痛定思痛漆乃賊膠貴不如賤此理甚昭既
脫於絪弛我冠帶人為不怡中實大快將知毫及豈不
夙戒恒舞酣歌猶賢噤齟公之達生數聞斯話何圖梓
桑盛茲蜂蠆衰羸及之有加無嗟蚩蚩之氓公又奚怪
始邑之瘡因於征輸自改為折痒者復蘇荒草野田徧
為黍稌瑣尾流離乃聚室廬起之膏肓報曾帛圖疥癬
之疾銜為剝膚孰導狂瀾莫可支吾憮人之幸士類之

吁豈公一身翻覆榮枯堅也疎狂學為詩章有唱俾和
動盈緜緜湖山之麓古寺禪房經論之暇風雨聯牀察
其愚歟謂無他腸可保終始實唯子良言猶在耳如何
可忘儼之些窳有意進取辱公甄收言庇其宇借我齒
牙與我規矩藏焉修焉公子我侶扶搖九萬數嘗見許
兩家衰翁少而習公眷念在昔忘其顯融自公歸田杖
屨相從時於酒閒慰其畸窮幸各健飯孰否孰通音聲
琅然曠若發蒙公今奄忽有識其恫矧於受賜他人莫

同天不可問，曷喻我哀。豈厭混濁，避其器訟。騎箕上昇，
帝庭寶宮。俯視下土，蠅蚋薨薨。我陳斯詞，酹以一卮。寧
為公哀，聊叙我私。匪私於公，世道之悲。報德以怨，豺狼
狐狸。俟彼天定，後當可知。嗚呼哀哉，尚饗。

又

嗚呼人亦有言，蓋棺論定。何獨於公，疑謗未靖。嗟世之
人，喜儂而輕，或矯為狂風節。自命畫餅噉饑弓，蛇宿病
舍彼昭昭，唯冥是偵。載鬼負塗，聞者易聽。攷公生平靡

不足證十年曹郎守官則勁不撓於權一麾旋迸羣馬
眇躬以捍百姓黜歸田間厥聲益負至今南荆甘棠蔽
暎豈伊梓桑而不知敬固宜同升勛名日競莫知公賢
覆謂公佞柄臣既傾目公捷徑寃哉斯言睥目羣瞪嗚
呼哀哉當公在朝不問家東僮之蚩蚩或竊為橫遂關
於鄉一呼百應有喟而言公施實盛若罔聞知彌訐彌
絙海壖瘠磽慳於物性稻則匪宜而稅是併號呼籲天
永賴寬政孰為之先維公錫慶嗚呼哀哉公壯自期庶

幾汲鄭晚亦自咍視日趙孟不圖吠聲遽掩其行令子
繼徂白日再暝受重者孫煢煢伶俜季子兩甥實同枝
穿嗚呼哀哉公神在天俯視膏肓譬猶蚊蚋未堪梟獍
菀旣當枯垢亦同淨吳山之西峯巒綿亘賜域芊芊土
膏泉瑩維暮之春卜吉而塋考妣則違子婦相並嗚呼
哀哉吾儕侍公學焉就正八珍一臠偶沾殘臠公顧解
頤留連觴詠曰古文詞燦然緯經唐宋諸賢六經胎孕
今之詞人妄生譏評斥遠姬姜昵近婢媵謫種相承口

古難勝猶望後生無售昏鏡旁及老莊是詮是訂尤切
憲章綜述列聖其言日新有告必罄飫所未聞沃醉俾
醒嗚呼已矣復誰韶令祖道一觴陳詞而營髣髴見公
几筵來凭嗚呼哀哉尚饗

又代

嗚呼天之生才實俾輔世既啓元良爰錫之配國之登
賢實由詢事既積勛庸爰晉之位自古以然道喪乃戾
履方則危競於軟媚於惟明靈獨能不愧未壯登朝簪

筆入侍帝重綵綸命掌其制繫國大典曰戎與祀由司
馬曹為郎祠祭稽古禮文大祝無秘肅穆壽宮天子虔
必厥詞煌煌以薦珪幣時長春官風稜獨厲謂公曰能
屬之代對將請于朝酬其勞勩公不詭隨權奸內忌出
守于荆快其睚眦政平民和不煩而治江漢之間號稱
茂異帝子于藩爭民所利少給市租大忤其意閹人構
患逮公囚繫萬衆塞塗追挽其鞅叔子去思至今墮淚
既歸忘出世不忍棄有詔起家遭讒復躋論定乃升廻

翔楚地節鎮未幾刑官入貳超遷秩宗章服三賜始明
于刑棐彝率又旣曰降典寅清是寄禮刑一物唯公克
遂及耆而歸脫身冕黻先朝所垂二氏所記有造必窮
有餘必識蓋公於學特為精詣故所居官有還無避當
其屹然獨持大義如遼庶人為汰匪諄主父在齊懷刃
欲剗公之抗辭不撓者氣壽陵旣卜奸或潛伺渝渝訛
訛衆咸愕眙公折其萌以紓國計雖履虎尾了不為惴
凡所執持多如此類不同流俗脂韋矜智迄終天年必

行其志列上太常將錫公諡公未嘗亡譬猶委蛻我之
識公實從初試慕公牧楚願學為吏公亦不鄙待以國
器今之仗節遄聞公逝俯仰今昔能不酸鼻公真大臣
後來孰嗣我懷明靈緘詞以酌嗚呼哀哉尚饗

又代

維萬厯年月日宗伯宮保徐公以疾卒先是邑之黠而
囂者巷公僮客羣而囂焉不思公之嘗有大德於斯人
也其東偏瀕海而居者某某懷憤懣不平之日久矣於

公歿後明年月日祭以特牲請於能言為文而告公之
靈曰嗚呼公之為德於鄉兮紛其賴以全活也彼狂奔
而羣吠兮何若斯之乖刺也豈冤抑之莫伸兮將貪夫
之好為訐也咸攘袂而大詢兮吾不堪此蠱與蠮也謂
左右其實証兮隔九閭而不得達也嗷嗷者何可盡信
兮竊恐夫當路之不察也公之再起凡十年兮由牧伯
而朝列也兩公子其實從兮無他子弟使戕剖也操奇
贏以牟利兮固無厭者之沒沒也豈強貸而倍收兮亦

維時政之騷屑也嗟瘠土之寡入兮恬不慮夫澤竭也
夫孰以告司農兮俾得改而折也維田賦之三等兮固
則壤於前哲也彼情竄之積蠹兮乃猾胥之窟穴也曰
均下賦於上中兮吏亦偷以補其拙也情莫之省憂兮
踵行此弊轍也公手為草以代訴兮監司聞而感頷也
遂欣欣以漸蘇兮庶不浚夫膏血也苟良心之不泯兮
如飽饑而止渴也曾不若畏壘之尸祝兮忍乃為此桀
黠也吾儕輟耕以太息兮中壹鬱其若結也疾黨人之

滅公兮身處卑而不能關說也公有大賜於吾土兮竊
不忍其抹撥也維海隅之斥鹵兮凡醴課其千鎊也既
灝漶而不可漉兮猶責洪波以飛雪也茲大海之吐吞
兮亦恃人之回斡也彼稅盈以償詘兮實諮公而施設
也吾既獨私此惠兮不覺夫哭公而嗚咽也人情誠不
可以一概兮胡衆口之反為齧也公固施而不責報兮
吾哀夫俗之薄以劣也喟陳辭而奠酒兮髣髴乎公之
來歆也尚饗

合祭王太司寇文

嗚呼公之文章行於天下擬漢及秦鼓吹騷雅四部煌煌世多習者公之出處凡幾廻翔亦既初服不辭繡裳為介為通孰知公常公之偉度如海則涵公之勤施如雨則甘不以文掩十猶二三始興以來奕葉相望蘭茁其芽誕必道上凡民有知靡不瞻仰公今仙遊其又奚憾將厭世氛還于恬淡綿竹之期於茲當驗某等辱在門牆或故或新不鄙而棄於誼則均武之先子昔同馳

驅暨乎弱息以吹以噓不幸短命彌惜其殂晚更知我
潦倒麓踈今世實鮮宜謂為迂時升孤子嗜古而拙公
謂莫知子羽我刷從我秣陵我文子閱含咀英華匪日
伊月堅也拜公在弱而蒙迨試京兆言憫其窮于館于
穀他山為攻自公予告靡日不從醉以朗月煦以和風
臨別之音提耳則空燧誦公文于冠之年蚤失所恃有
痛莫宣庶幾一言賁之九泉不謂獲請數奉周旋承公
之訃飲泣連連公來自天為世造福命之不延寧為公

哭哲人云亡百身奚贖言叙其私以薦一卮彷彿見公
笑而醕之尚饗

又

嗚呼公之返真歲閱五期久殯未祖以需日時生為正
卿歿得賜葬維是卹典有畀無讓公昔遺言從先大夫
戒其嗣人我違汝辜子乃上疏具陳哀誠隱君之賜義
不敢承天子曰嘻國有故常汝其勿辭往治爾喪爰用
復土賜域之左於是焉藏魂魄以妥方公壯歲有意馳

驅旣遭家難十年茹荼先皇之初沉寃昭雪恩重身輕
言脂其牽晚稱遺民賁于丘園再蒙恩澤復就寵樊未
幾乞歸此身吾有夜壑舟遷柳忽生肘唯是寃窳公志
則存庶幾地下永奉晨昏考公生平凡再疆起義兼尊
親臣臣子子吾儕後生咸以文行遊公之門叨陪觴詠
往者哭公人寫其哀許與之分於今永懷何以祖行爰
鷄絮酒陳詞侑之公乎知否嗚呼尚饗

祭董大宗伯文

代王

嗚呼維昔江漢篤生元良既膺寶厯有弛必張公對大
廷廣川頡頏含腴採華厥詞煌煌典司綸綍在帝之旁
晚躋春卿寅清是將勛名既著俄卷而藏用啓後人奮
翼翱翔匪榮其私酬國未央凡茲盛美史乘則詳我所
感戰情結於腸自昔稚齒學為文章氣盛才拙莫知披
猖先子之故側聞大方棄瑕錄瑜目以珪璋齒牙餘論
許紹青箱龜勉十年始舉於鄉再獻再刖乃忝周行時
公元孫聞譽日彰指心相期不同尋常累受國恩勗哉

勿忘猶憶少時辱公稱揚知己之感於是焉償何圖大
故匍匐奔喪疾疾繼之窳不可強公今已矣我竇倬倬
客歲之冬公以一航翩然東下止我中堂鶴髮朱顏其
容蹒蹒終日匡坐間舉一觴每至夜分吐論洋洋謂當
百年彌壽而康胡忽厭世白雲徜徉公雖早退其施不
長為國薪樵實棟實梁唯是樗櫟於用無當疇劓而削
能不徬徨元孫之歸身晦道昌今之繼起彪炳詞場或
出或處咸為國光公收其全歿有餘慶我之哭公默而

自傷拜瞻遺像袞衣繡裳尚如平生音徽孔明陳詞寫
衷薦此椒漿嗚呼尚饗

祭潘司空文

代

嗚呼大臣殉國匪才之難袖手在傍噶沓來干爭獻所
疑蝟磔矢攢慨然任之力排衆譴浩生說趙實為心寒
國是以定民獲少安豈伊識明有慮必殫河流湯湯久
湮禹迹自北迤南蕩漾莫測避之而遷荒哉賈策回河
北流徒費工役其在於今勢尤異昔自引而漕兼賴其

力合淮以輸歲虞激射歸然園陵憂在肘腋天子曰嘻
疇稱厥職有言公能俾往底績公來行視講求實詳增
卑倍薄允賴隄防不迂以慰少殺其狂彌東彌遠水性
之常下流既滌孰壅為殃驟詘復信奏功明堂民免為
魚室廬相望一時之利璽書煌煌公今云歿淮壖不忘
嗚呼哀哉昔我先子嘗叅名藩公以臺臣歸賁丘園許
與之分夙聞話言暨歲壬午鍛羽獲騫簸揚而前公循
吾昆始識公顏飄髯如戟目以通方勗以學殖曰今之

人誰不外飾子之易夸前脩所亟爰命女孫許字弱息
終始之誼維是姻戚自余在疚迄今數年中遭舛互有
痛莫宣區區之懷日省予愆猶望後來無忝於先稚愚
失學快意所便況慙義方舐犢多牽我是愧公每用憂
懸長君宦遊厄於豪右公論在人使出稍售何圖倉皇
還哭公柩嗚呼哀哉老成既謝時事亦更病淮而號泗
上之氓謂當改圖役豈易興易變則通毋毀公成令公
而存別有支掌寧固而愎毋躁而輕維公諸子家學是

承公則已矣尚有典刑嗚呼尚饗

祭王奉常文

嗚呼公之學問淵源文章煒曄騷哲昆而齊騁譬蘭茗
之集翠猶汲古以修綆蓋遠擷六代之菁華而近以濟
南為庖郢公之敏於治辦長於師帥紹前烈而彌永譬
鑊邪之發矧猶張弓而先散蓋終焉八閩之模範而始
定魏國之家東凡公生平在二三椽筆固已勒堅珉垂
汗簡而琅琅炳炳寧獨海內所共瞻仰將傳信於後世

而莫不想見其山之高行之景維堅與表緝愚無知不
獲侍公於生前聽其議論之踔厲覩其丰儀之峻整而
奉以為師猶幸與公之諸子遊處而庶幾於私淑者五
六年於茲公居家庭內和而外莊凡所以訓教其子必
依於醇謹鑒於盛衰片片乎刻鵠畫虎之喻而告以門
地之不足恃者其言尤諄復而可思此雖長公之敘述
亶亶或有未悉而洵美象賢時為吾黨而闡繹緒言輒
拭涕而歔歔嗚呼哀哉公位不滿其才年不滿其德固

將貽厥後人以未艾之福乃四子競爽又弱二馬伯兮
叔兮皆以恭敬溫文欲並轡於康莊而遽脫其轡獨仲
也莒發穎豎方有聲場屋而季亦迢迢退讓抱未瑀之
璞一塤一簣猶足備九奏於咸英以和鳴國家之盛而
無負於式穀若公之明悟既了無罣礙於去來而何
戀乎浮生如轉轂矧其卓然不可磨滅者又已灼灼在
人耳目乎丹旒翩而靈輶既駕生芻一束其人如玉奠
酒漿以陳詞徒悵悵於百身之莫贖嗚呼哀哉尚饗

祭馮李馮封公文代

嗚呼世稱人子所為親榮曰高其門有進於此匪直榮
觀令德之溫乃厥考心所用自慰亦在後昆珪璋特達
爰有名位出為世珍疇苑其條疇導其流水本本源維
子之為寶父之貽以克有聞吁嗟我公含和養醇賁於
丘園賈既弗售是啓賢嗣甚秀而文擢第禮闈袞然舉
首矯矯高騫公顧樂之吾幸有子可遠世紛巖觀川遊
佐以觴詠聊樂我員疾革之言我老牖下清時逸民孰

屈而信孰歿而存唯吾子賢某少習公與之遊處真若
飲醇兩附令子科第之末以自濯薰唯余家嚴視公兄
弟情好素敦謂當百年皓然兩翁鶴氅綸巾胡忽厭世
棄其親朋曾不少延我別而來拜公堂上維暮之春迨
承公訃自秋涉冬彌曠九旬乃克緘辭以抒悰悵薦江
之芹我實愧公公能鑒余簿領為煩嗚呼尚饗

祭檣李朱太公文

嗚呼榱桷豫章其高十尺其大數十圍而任為棟梁則

必不生於尋丈之蹊而步仞之岡其於人也亦然非甚
盛德則孰為厚其積而開厥後之人繩繩乎德彌劭而
名彌昌於唯我公含真葆素蹈義履仁凡所施之閭里
而被之膠庠即未展其生平而在卑能施在約能裕蔚
然盛德之光公有象賢世其家學蚤播聲華晚就閒散
其所抑而未試試而不苟一稟承乎公之義方爰啓孫
枝蘭茁其芽並擅國香而仲遂以明經起家始出宰乎
南漳仍移牧于此邦為冰蘖為鸞鳳固已名被八閩而

譽冠三吳豈非公之所厚積不售於躬而盡以貽諸後人使紹述而闡揚也哉某以沉淪廢棄樗散瓠落之才辱公哲孫時與從容於議論文章蓋未嘗不述公之所訓勅之者庶幾乎陳大丘荀令君之不亡且言公年已八十餘而神明不衰如少壯人一旦遺形委蜕而遊於無何有之鄉公又何憾於人世所為公悼者仁君之勲業向鞅掌於簿書而季孟之學殖未獲騁於康莊要於克自樹立以酬公之所未償則譬猶深山大澤之產

干霄拂雲靡不飽雨露而厭風霜異日者之為棟為梁也審矣明靈有知其尚欣然而來舉余之觴也耶

祭侯大叅父子文

嗚呼昔歲作噩公以踰耄之年示疾而辭世回顧諸子環列孫曾岐嶷夷然於啓手足之際人皆謂之僊遊諸福亦云咸備於時長君雖未忘於揚名撫賢嗣而自慰痛定之餘以稔聞青烏家言行將求乎福地歷數年而得之阻日時之未利年六甲而甫周抱沉疴而遽逝後

又五年而子也登朝奉策書而三使陟衡嶽之峩峩觀
嶺海之噦噦歸而煌煌乎綸綍之來賁已乃擢官給諫
言歸覲省奉觴於王母及母氏之前蓋一耄而一老旣
壽且康猶如甫哀之歲於是諏日庀工將以日躔星紀
之次啓公與長君之殯歸於玄堂以永安於百千禩邑
之白衣冠而送者將踵接於城闔非頽且老也且牽舟
而前相率拜於墓道之隧某等咸辱交於數世託里閭
之末契輒以生芻絮酒往酌而告以祖道之祭蓋江自

西來泖自南下渺瀰而來滙以莫逝者之魄以宜爾子
孫於世世若公父子之稱於鄉之人與永有貽於來裔
有銘有碣非可罄於造次之陳饋嗚呼尚饗

祭曹養吾先生文

戊子之歲始獲升堂以通家子拜公於床形臞神王骨
聳顏蒼心與貌古靜然而方晚實聞道寡營孰哉公始
望七杜門滅迹軒車來過輒辭以疾唯平生親笑言促
膝何圖新知亦許入室觴詠餘閒圍碁彌日性不食酒

僅能濡口座客滿前分曹列偶子承其顏滑以瀝滂山
肴谿藪辛酸畢取叶一飲一石匪升與斗公笑而云有
子無負川遊巖觀吾意所安於馬卜築永以盤桓言采
於麓言釣於干春花秋月歲暮雪寒短歌長謠興至必
殫生人多欲紛紜馳逐獨以素羸早脫桎梏少舉於鄉
公車奏牘三獻莫知遽懷其璞乃託計然用展心曲既
積高貲好施奚黷賢嗣繼之有聲塲屋屢上春官珠掩
魚目公閱其勤慰諭諄復子之榮親豈必章服維爾好

修繫我多福況於後來森其蘭玉達哉斯言老氏止足
如公之賢弗試而竣養痾林樊以樂天年是當百歲胡
不少延實夢斯覺周也遽然自弱而耄一彈指間以神
為馬駕而上仙遊彼帝庭俯視八埏某託末契見其四
世公子吾兄公我父事我朝我夕我館我餽不以沉淪
遂見鄙棄今茲南遊公訃忽至臨觴潸然起而攬涕典
刑是傷匪私其意時日之良期月而藏跼而陳辭薦以
酒漿髣髴見公來舉我觴尚饗

學古緒言卷十三

欽定四庫全書

學古緒言卷十四

明 婁堅 撰

祭文十四首

祭朱通政文 聞計

嗚呼守道通方實難其全孰有備美體方用圓感恩知
已各繫其逢孰是契合情深道隆於維明靈宅夷蹈峻
清而能容廣而能慎其取於人寧鈍無銛其責於人以

鉅掩纖嗚呼豈無清節於物多傷廉也勿劇其道大光
豈無厚施或私其恩形骸之內古道斯敦邑之凋敝如
人病羸公曰食之藥石何為賦從其緩令蠲其煩如冰
之潔如春之溫禮厥耆碩拔厥俊髦不罰而治化餐與
餐去後之思至今如新庶幾節鎮復來拊循日月以須
未慰饑渴一朝奪之天子降割嗚呼哀哉公始拔士拔
我衆中以言信行日就磨礱猶憶行春仙舟共載德音
泠泠是培是漑公既徊翔予日偃蹇書疏每勤勗以歲

晚昔公北上期會吳門促膝笑談自晨及昏信宿而別
賦詩言懷務道之合匪俗之乖洎乎再起茲秋為期時
暑方虐後到而疑既謁門庭旋枉軒車公來惠招辭謝
以書請俟畢試飫聞高論以酒彌縫解其勞困老親傳
言促以遄歸公方病脾臨發依依留書聞人具告之故
曾未經旬俄而承訃嗚呼哀哉公之屢擢每官於南我
至都下謁見者三白門橋東石頭城外數聆話言繼以
歎慨何圖斯遊僅一覲面痛結於腸有淚如霰嗚呼哀

哉公之名德鬱為世望賢者所歸雖愚無謗才用未展
命不其延所不可問曹曹者天既畀之厚胡奪之速匪
天不仁抑民無祿將世之汙卒以莫伸寧喪國寶毋混
於珉自古潔清幾人富壽彼鄙而頑福澤多有曾是力
田欲勝逢年以德為券豈曰誠賢養之不終有伯與李
志之不酬象賢維嗣我哀斯人為公大慟國撓棟梁士
失麟鳳嗚呼哀哉不訾之恩匪利與名在獎其進以古
為程相知之深匪才與藝在信其衷雖窮不墜恩不能

報知不能酬我則內慙公不我尤立不易方用不違時
古道邈矣能不悲思嗚呼哀哉尚饗

又代王

人之相知貴相知心或異圓方而同酌斟匪迹之諧其
中則忱維公清峻垢氛莫侵挺然特立如松出林潦倒
維予與俗浮沉有喙三尺自比於瘠中間相去寧尺與
尋泉流高山何有蹄涔鳳輝五采何有翠禽云胡契合
證古信今公念我甚我媿公深自今已矣此意誰諶嗚

呼哀哉清而能容是謂道大嗟彼鄙夫譬猶牙儉偷肥
幾何身名俱敗其或好修又不勝隘唯名之尸唯物之
蠱公嚴自律待人不然仕非為貧吾義毋售奈何衆人
望以聖賢世儒齷齪行以名羶及試於用拘攣不前至
於友朋意氣莫宣公雖逡逡遇事慨焉公赴留都道經
於吳扁舟東下一過吾廬予時屏跡田間掃除公以籃
筍就我跼蹐促膝之談衷曲是輸既別而歎此真丈夫
公方嚮用不棄慵疎曾是蓬蒿足音來娛自今以往孰

慰窮途嗚呼哀哉公始為邑於閩之漳理成獲譴厥譽
彌彰公來識面鄰邑相望維吾先子謂公循良已擢儀
曹改考功郎視學江右卿寺俄翔病免家居用韜其光
以納言起將鎮一方而年止服政官止五品未展欲為
賞志以殞士失依歸國喪膚敏凡厥庶民罔不悲憤況
於深交淚何可忍嗚呼哀哉我之哭公國士之知友道
日喪化為魑魅無與為質痛結肝脾擷蔬薦酒跽而陳
詞髣髴見公如田間時至公操履洎其設施後有作者

徵於口碑未敢以誄有涕漣而嗚呼哀哉尚饗

祭朱西宗文

昔歲之冬郡邑朝正道出於吳舟車縱橫我歎於座思
通政公客曰傷哉善人之窮比聞公嗣復已短命疑信
半之知其善病今果然矣天可問耶蕭艾敷榮蘭蕙其
芽自公云歿凡再晤君食貧而瘁有感無欣性又狷甚
不取一介我為之顰如何可瘥火之鑠金醫窮莫救人
之好修人胡不裕叶嗚呼哀哉維君履方稟於儒行其

中泊然又依禪定將蛻汙濁上生天歟抑再為人遂師
浮屠我在門牆為世所擯守其顓愚匪俗之殉倏而哀
白報德何時唯是骯髒無慙見知公昔之官實攜元孫
我時方舟時接話言舞象之年頭角已露翹首天衢非
久橫驚彼蒼茫茫人定則勝如聲與響有召必應慰太
夫人洎君之薨日可俟矣其又奚悲所可痛者公廉不
劇位不滿德中道傾逝意君接武又憊於貧俯仰不支
妨其躬身將人所享不係其行或世之哀天亦醜正吾

不敢信徵於來茲眉睫之近何足致疑生芻絮酒酌而
寫哀靈如鑒予髣髴其來嗚呼哀哉尚饗

祭沈中丞太素文

嗚呼顯晦之分以俗觀之其途天壤唯有道者處顯而
恭在晦而廣公之辱交棄彼脂韋憐我骯髒昔在水部
歸於其鄉東下海隅邑有茂宰臭味實同語次及余出
其試卷宵歎於座晨禮其廬伯氏之嫡屬以石攻與共
三餘每一晤言何以當公有迂且踈匪朝伊夕有倡必

和俄奉簡書自省而臬督學關中別我西征我笑而言
今之在事有權無衡君以衡往復恐才難或不中程還
書詫我彼有傑然鷄羣之鶴匪鑑則明士固易知玉也
弊箴予既屢蹶以此媿公書問不數猶蒙記憶碑本是
貽慰其寂寞先君之葬公移齊藩書來賻俱我不敢承
感其誠念賦贈干旆入當獨坐出即摠戎爰贊中樞已
果授鉞作鎮大梁旗纛徐徐未幾移疾累疏得代歸臥
東山我欲扁舟布袍往覲信宿而還何圖訃聞驚愕問

故有涕潛潛楞伽之麓湖水所匯形勢回環往營壽藏
陸遊平莽水宿澄灣神遊其間一去不返邈不再攀嗚
呼哀哉人之知公早以文戰名動帝京晚而登用將由
內臺陟為孤卿所莫能知氣剛局方屹然不傾有度有
識有惠有威為時重輕未究於用未躋於壽騎箕而升
嗚呼哀哉公昔方壯求友山澤而得顧翁昨歲乞身聞
而私喜儻可比蹤而今已矣平生之好於是為窮靈輒
既駕丹旄翩翩往即爾宮我有生芻以侑哀誄一寫予

哀嗚呼尚饗

祭王稽勲同伯文

嗚呼昨歲仲冬書來招余曰病漸深肉去存膚日噉幾
何枵腹如壺及今相見有懷欲輸仲醇南來余自東徂
同日而晤言笑晏如為信宿留與同朝晡臨分悵然異
春而蘇庶幾勿藥息慮自扶已得還報筆墨模糊有增
無損勢難枝梧母氏未葬痛不及圖外憂門戶內憐妻
孀以此瞑目其將能乎感念百端攢刺病軀疾高下治

求腴得枯倉皇再來卒以號呼嗚呼哀哉予始識君歲
為丙子相與周旋後又一紀君之將翔省覲留邸余時
鍛翮放于山水迨官睢鳩歸以哀毀方慙攻玉每為倒
屣燕閒所聞洞見底裏扁舟石湖欲以凡事余謂不然
向嘗竊鄙所貴友朋豈減昆弟苟為斯名倫止四矣君
益慨然曰子吾砥乃延授經北山有梓模範謂何實懷
斯恥余哀杜門君出旋弭時一過從迹遠心邇頃歲金
闔夜燈同艤君見吾儕其色有喜宵分之譚佐以甘旨

君談甚豪或臧或否既別咨嗟誰歟可擬氣雄神王必
多受祉而官止五品年僅踰耆耳於戲哀哉如君伉爽
迹於疏脫及乎精詳靡有輟轡或疑其深城府過設有
信其衷肝膽俱裂鬱勃者氣而文特夸豁堅凝者志而
用殊活潑早擅科名晚見抆擦常思得當為世肅括奮
不顧身要與俗別汶汶以完寧察察以缺所為痛者貴
志而歿嗚呼哀哉君之令子亟思表見改絃更張衆以
規瑱君謂丈夫何塗不銜父子之間當有獨見世猶忌

之莫借以便巍巍諸孫行看豹變其嫡而長王母所眷
君別其名以著繼繼孝慈之風施及來彥爰兆復始譬
猶集霰既以慰君且勸為善日余哭君即以此唁君其
聆之歆此薄薦嗚呼尚饗

祭博士何原錫文

嗚呼昨歲春暮君過吾廬痛念先公曾不少須語我暗
投邂逅其徒要以西邁自潞歸蒲所不能從東望菰蘆
庶幾青衫還為親娛既而謁選得官新都歲晏來歸冰

雪長途馬鞍之陽引領歸帟何圖入門涕淚霑裾今徒
骨立神已先徂執手慰君滅性可乎劬勞之報盍葬而
虞君既別去予踵步趨輕舟俄發悵望跼蹐欣聞令子
茗發瓊敷凡百俊髦莫或枝梧慨我遲暮方此將離春
雨之淫逮於夏初且曠疏問況乃舟車令弟訃來驚起
嗟吁繼以泣下兀然喪吾嗚呼哀哉予始暱君於彼南
徐行則接袂榜也同牖高秋涼風欲忘客居後在暨陽
又數相於君攜愛子曰勤菑畬笑言之歡不棄散樗別

來耿耿每懷濶疎自君之北予歸糞除追念舊好今也
則無嗚呼哀哉君之行誼稱於里閭君之詞學遠為範
模百未一展賁志黃壚天不可問尤在賢愚彼侗而駮
終老膏腴此賢而瘁不及霜顙俟其既定夫豈終誣維
塤與篪將起詩書我陳哀步託好生芻豢見君憮然
清臞嗚呼哀哉尚饗

祭張儀部無隅文

昔歲戊子就試金陵遊處之暱每同寢興予適病瘧欲

歸未能君頗矜奮喜於得朋迨乎鍛羽意憤不勝顧我
恬然悔且自憎予曰有命非人所覲君今踰壯我又加
四況各終鮮又艱盾嗣試觀生人萬不一貴顧影而單
百纔一二姑置所難而思其易子曰不然天匪曹曹苟
無大戾寧剪吾宗唯是遇合如帆待風無風而前艣楫
之功其後三歲君舉于鄉再試南宮天路翱翔未幾銜
命祗役大邦楚之多材考厥文章還而見語所獲過當
今之憂念乃在蒸嘗予笑而應毋勞遑遑子恃艣楫颿

則高張天道可信必有餘慶我迂且頑世宜共棄至今
單子天若同忌子之熱中當無不遂別又四年君既抱
子書來欣然易憂以喜造物於君亦云厚矣改官而南
蓋計所便有未釋然卒難自遣一心為盾百憂為箭如
蝟之攢而不克見為膏幾何緼火寶多首尾惴惴以焚
其和嗚呼哀哉旅櫬南歸穉子獨留羣公之慮風土不
侔欲令成長歸解母憂母泣而望賈涕難收人或謂母
有美誰俦室遐心邇何虞阻修時其餽問通其綢繆唯

力之視匪人之尤孤嫠相倚如水石投年似為異終焉
見休以此慰君含笑泉壤我辱君知憐其骯髒宇下之
庇譬景罔兩哭陳斯詞追叙疇曩奠藻與蘋庶其來享
嗚呼哀哉

又

昔承君計驚顧相悼潛焉涕零洎乎喪還拊棺長號痛
不勝情所用為慰唯是孺子可望長成何幸於天本既
槁矣復折其萌其悼君者曰既踵武再振家聲厚畀之

才顧奪其年天胡可憑晚錫之嗣歿斬其祚抑又費費
或解之曰世道缺陷鮮受其贏如君世胄能以文起不
保一嬰予角去齒從古以然有平有傾仁必壽乎且有
後乎兼享令名宇宙大矣古今邈矣萬不一并天人之
際譬有物焉欲知重輕往來取衷人者權也天司其衡
有進於此曰是宿業如景隨形唯聞道者解弢釋粘俱
忘愛憎過眼空花何貴何賤孰殤孰彭如飲而醉沃以
清泠既醒無醒吉日辰良言歸窀穸適歲新正唯予二

人夙昔之好情均弟兄悲極而思曾此幻化而足牽縈
嗟君生存憂瘁半之以畢一生歿而復然魂魄私恨永
結幽冥敬陳薄奠縱言大通以祖其行靈乎聽只形閉
九原神遊八絃嗚呼哀哉尚饗

祭宣適吾先生文

嗚呼憶始髫髻已識公顏偉然長身屹立如山及稍有
知得公之心如淵斯淳衆所酌斟就之而溫樂易君子
飲人以和莫測涯涘至激於義譬渴與饑仁者之勇凜

不可移公富詞學儕輩推讓屢獻而別有舟無榜行道
為惻公乃恬然曰世我棄吾駕可旋偕我同人賁於丘
園且留其餘遺子若孫公饒酒德飲可數斗晚以病止
幾不入口凡所自割大率類此所以皦然不汙泥滓居
常語我更事以來政俗之變頽波莫回闕文借馬酌泉
鞭蒲誰復嗣者覆謂我迂予其識之長此安極每語移
時相對太息公既厭世世益好夸欲聞斯言尚可得耶
昔我先子臭味實同歲赤奮若先公而終我有女弟歸

公叔子翁媼共憐二十年矣爰有二甥漸露頭角何以
慰公最使勤學嗚呼人之老成鄉之典刑一朝奪之能
不涕零清酒一壺往告予虔髣髴見公來凭几筵嗚呼
尚饗

合祭殷職方無美文

嗚呼維昔識公皆以穉齒先人之交逮于頑鄙未有聞
知公顧之喜此汗血駒一日千里雖則內慙矜奮伊始
於時公名在遠猶邇明月暗投按劍相眎乃會其徒我

鐸爾砥爰及後生令奏其技曰予厚集汝試摩壘再鼓而麾蹲甲注矢何以佐之有酒孔旨公每為文或臥或起口吐厥詞然後伸紙誦之琅琅聽之靡靡感而為瀾爛而為綺亦既老成難以譎詭何有愚蒙乃為倒廄知公用心始駕如是車在馬前斯之謂矣公雖食貧而性豪侈好為酒會必豐以美譔浪歌呼歸於有斐自公未出洎遭妻斐三十年間如一日耳咸謂康彊尚多受祉臥疴決旬遽捐牀第嗚呼哀哉堅老逢衣曾不媿耻恃

公之知或不在此兆登潦倒困於鞭弭黃金臺邊壯心
欲死公於吳英口授經史凡在師門受恩無比自以少
壯佩服知己推挽後先增釋譽毀今其漸衰未獲出否
以是媿公有淚如泚嗚呼哀哉公才過人自謂跡弛大
德之閑不踰咫尺官至大夫家猶寒士口多微辭或疑
為詆善善之長十倍所訾恥為鄉愿同於惡紫至其坦
懷洞見底裏亦曰虛中錄及欵啓有急而告孱弱同倚
有耄而賢貧病加禮人之云亡孰蹈斯軌鄉邦之嗟其

何能已如或吹毛索公痼痛我不敢知後有君子奠而告哀匪以為誄嗚呼哀哉尚饗

告張二丈文

維歲戊申冬十二月張二丈茂仁先生歿期年矣先是通家子某等於訃之夕往哭焉葬之日往視窆焉及清明又展禮其墓而獨未克為文以告之猶憶先生閒居每得吾輩詩輒粘壁間坐臥諷之其後相見聞先生之論莫不快然意滿蓋先生之於文終身好之老而不倦

如此方其未病也聞予作壽榮堂記一日晨來叩門索
觀讀竟三歎以為翛然得古作者之意已呼孟陽來共
談笑竟日乃別不意其遽病以歿也雖先生平日之所
以告語者不止於文字今墓有宿草矣安可無一言以
寫予哀乎其詞曰嗚呼我少未冠獲交令子側聞話言
誨以讀史歷代之編如貨在市以待求者紛紛錯序通
鑑紀年本於左氏如絲在機事經人緯縱橫貫穿究厥
終始謂可用世世莫能以帥臣悍驕從古以然宋懲五

季徐收其權逮至于今罔阻戈鋌謂秦毒痛有剗而傳
匪郡匪縣孰使安全蘭陵大儒曰法後王知時達變不
主故常近代儒者畫餅為糧不顧饑死好為荒唐先生
之論期於實效豈若拘拘方枘圓鑿至其談經實探窈
奧孔孟昭然胡不自劬而以虛恢妄相為驚日月中天
何有螢爝所謂文章以道為程古之作者才與識并西
漢典重其音鏗鉤在唐維韓源本六經柳克媿之如月
長庚廬陵鳴宋寶開大聲爰有眉山傑然高掌王旣峻

潔曾亦淳泓其所自得各極晶瑩彼不能知以時代評
自宋之南庸淺儇輕漸矯為豪匪雅而傖以剽為博以
蔓為菁吁可怪也實盲後生誰歟好古允有師承今其
往矣孰告孰聆予賤且衰有志未能舉世嗜痴如何可
勝先生之壯好言老聃推剛為柔寧鈍毋銛晚悟空寂
復歸瞿曇南能之宗庶其可叅已而見語尼父吾師靡
所不有佛老何為論語一書童而習之豈唯莫由且莫
能窺淡而不厭老之希夷克已而仁佛之毘尼吁嗟先

生允蹈斯言每當嚙啗杳然默存有臧無否吾道自尊
及乎譔譔不移衆謹貌之芼芼若混渭涇所莫能眩其
識之明中之兢兢若重愛憎所不可奪其執之恒學志
其人文挾其精而知之深者獨二三友朋予之告哀實
悼老成後有命世斯言其徵嗚呼哀哉

祭沈見吾先生文

嗚呼先人之執存者數公自少迨老唯公實同二年以
長前歿七年判隔幾何行復周旋我念疇昔兼悼老成

匍匐往臨有涕沾纓昔我先君師事廣信獲交仲季有
譽無怯旣困章逢幸各有子復令頡頏勗以經史公子
競爽豈如我頑或騁或蹶猥同伏跽諸孫駢其氣如
虹曾是璞玉而以石攻昔之侍公我髮垂肩翰墨餘暇
每廁賓筵今之侍公我髮其華杖几從容相顧興嗟昨
歲長至屏居一室時勤書疏訊公微疾聞其減差眠食
如常謂當百齡永享安康公孫生男於茲仲春走賀充
闔迎笑諄諄何圖奄忽厭世仙遊訃聞鄰邑徬徨客舟

四十餘年記猶昨日風俗之墮漸漓其質唯公子孫允
蹈孝友尚有典刑以詔于後賁公泉壤可券來茲哀我
父友酌而陳詞平生之分非言可殫庶其來聆鑒予辛
酸嗚呼尚饗

祭徐攝山先生文

嗚呼公少以詞學有名諸生中之無競色又奚矜人皆
稱之喜愠不形晚升於學終困一經選為縣令廉惠著
稱資格為拘去之蠻荆滯淹頗久歸耦其朋性非食酒

不厭深更晝需肉味佐飯則恒餠餅及糜宵坐焉憑伎
筵絲竹有召必應暑雨之晨花月之舛翁為祭酒笑而
不觥夜不扶杖黯然一燈行泥淖中丁丁屐聲彼有蹠
跚羨翁體輕翁曰否否吾藥為飭自壯至老餌木與苓
緬懷攝山藥草藥生欲往求焉齒長未能別未旬日有
言吾兄脾氣不宣頗倦將迎往問而信士不勝形容則
瘁矣言清且明竟以溘然奪我範型嗚呼哀哉我嗟世
道撲散淳淥其驚於機平地焦堯其矜於飾售跖以堯

或有詆之彌迹於恍以臆為權以舌為刀有面而詬或背而呶此又叵測匪吾黨交翁今仙去遊於次寥下視塵俗蝶胥蟾蜍雖昔所安亦同冰銷維鳳維梟維蘭維蒿自視等耳其分則遙古云論定終焉不淆我懷其人望風長號倬彼鬼瑣詎曰堂坳翁去何之聆此大招嗚呼哀哉

祭龔方伯汝脩文

嗚呼公之臥痾距其卷懷垂二十年時方踰強形神俱

王早賦歸田性喜賓客分曹博奕飲以觥船少長咸集
醉而歌呼迭奏管絃或時閒居卷秩紛披手不停編始
乎孔氏泛覽百家亦玄亦禪去之田野於彼城南為山
聯綿水樹周遭輕舟容與山堂翼然豈唯夏秋追涼而
已雪淨花妍四時遊觀於邑為最至則忘旋晚病風痺
不良於行藍輦公公自頃痰壅脾氣不宣有坐無眠屢
往問訊形憊神閒了無戚顏未幾承訃感念疇昔攬涕
漣漣嗚呼哀哉昔我先子獲交虞部若兄弟焉變起倉

卒有友數人不媿重泉公視猶父先子之歿三哭几筵
當其生存彼此過從執禮甚虔予少五齡童而肩隨今
亦華顛彼速其成稍知佔畢自以無前目擊墮風其業
詩書其人市廛後此一紀當復如何將遂天淵如公幼
孤能蚤自奮無墜其先此衆所悉吾於懷舊獨窺公賢
其所脫畧小小自弛蓋氣之偏獻歲二日賦詩為壽公
老而傳維此一觴易祝以奠嗚呼蒼天哀哉尚饗

學古緒言卷十四

欽定四庫全書

學古緒言卷十五

明 婁堅 撰

祭文十五首

合祭李叅議茂實文

嗚呼自昔悲憤究論天人莫如柳子雖激而真禍福賢
愚分塗以出其適相符十不得一是信然矣古今豈殊
執表論影非迂即誣如君之賢而以客死所得於天年

又止此跋涉之辛簿書之勤自夏及秋勞形與神人或
謂君過於峻潔直木甘井先伐而竭為此言者殆於吹
毛彼不能知何損秋毫吾儕知君不勝盡傷未免以臆
責報茫茫死生大矣胡見之小冥心以觀孰壽孰夭嗚
呼哀哉君之謙言著於諫垣積與時迂旋出叅藩令君
而壽竟所施設誰與等倫為世魁傑君之令聞浹於鄉
閭瘠土窮民爰賴以蘇九里之潤已各滿望逆計後來
其又奚量而天奪之速志業未就徒令有識痛心疾首

嗚呼哀哉君實善交能愛而親各隨其分侃侃闇闇色
溫以恭與物多可涇渭之明實輕鬼瑣識明以敏視人
無前貶損之意每下仁賢如吾六人始以文狎莫逆者
心情好日洽昔歲丁亥為會而盟期共切磋不苟為名
藝文之暇酒酣氣振薄雲干霄靡有緇磷君騁驥足高
步康莊數年以來或顯或藏自君使還休於里第握手
之歡疇昔無異猶憶江干流連飲餞別君一年而以哭
奠嗚呼哀哉君之嗣子孝友天植一步一趨先民遺則

自承凶問久絕水漿迨乎啜粥猶屏桂薑篤行若斯克
昌君後吾儕念君欲竭鄙陋行方智圓則幾乎全九原
可作必謂曰然少者六齡眉目娟好哲兄是依成立可
保天之報施所不敢論君雖蚤世不沒者存蘋藻之薦
以洩其哀臨觴一慟肝腸為摧嗚呼哀哉尚饗

祭王伯栩文

嗚呼君之文章勁悍峭拔魁然劃然見者驚怛胡以回
翔健翮屢鍛匪銜於辭而矜于法君之幹局不激不阿

敏以應猝靜以鎮譌匣藏鏌邪剝割如何晚就冷官日
月耗磨君于交接飲人以醇其中之夷而色之溫孰久
而疎孰遽而親宜福之遐僅踰五旬天可問邪人可憑
耶恢奇見擯鬼瑣乃升驥服鹽車駕馬是乘栽不必培
覆何必傾嗚呼哀哉始君謁選人為憫焉未第而試俗
所棄捐吾儕聞之獨謂不然雖未獲展猶執陶甄唯數
學半老更精研況彼谿山可眺可沿維歲之春蕙蘭斯
馨層岡複嶺吐花冥冥彼出者荼紫茸熒熒何以淪之

山泉泠泠庶幾見分植我戶庭瀉我瓢勺我醉旋醒而
今已矣腸斷涕零嗚呼哀哉每憶過君枯槩在枰香幽
酒冽竹暗花明雜以嘯詠肝膽俱傾至則如歸歡極平
生如何茲來哭對銘旌嗚呼哀哉君之連蹇生人之瘁
於君何有修短不貳目之未瞑我知其意母氏在殯不
克襄事疇歸其喪從母于墳維太保公洎編修君終焉
孤寡尚賴殷勤慰君九原代感以欣我陳斯詞以侑藻
芹髣髴見君凭几而聞嗚呼尚饗

祭徐孺旭文

嗚呼君生之辰歲在癸丑先公宦達旣三年後自童及
強咿唔窗牖筆札丹青兼出人右長身傀儡性頗食酒
時陳珍羞求此良友歌呼獻嘲咸謂甚口凡四十年福
履則厚僮客之豪爰召羣詬彼氓蚩蚩狡獪來誘一呼
而囂千百其耦射影吠聲夫何不有君於斯時不震不
忸出還其鋒囚服泥首入承公懽共厥瀟滂旋遭大故
茹哀蒙垢衆方豺狼已為禾畝或益之距恣所踐蹂自

春徂秋對薄糺糺哀與憤并有閹難叩心焉鬱結孰刺
孰灸厥膏伊何門則亡牡鬼瞰其室主人出走病不踰
日柩聲有响煢然遺孤與李相守晝哭逮夜傷哉老母
謂天嗇之世年所受亦既優游疇為之佑謂天俾豐乃
奪其壽晚遘閔凶曾是焉取造物杳冥奚憑而剖君雖
有文今將覆瓿貴介遇君君瞋目否海壖瘠鹵巨室難
久松栢之生不於部婁理或然耶君則何負凡我締交
亦孔之舊忽焉承訃失足與手勢極而反後當復茂或

慨而培矢以無苟有酒盈樽佐以餌糗粿來歆酌此
大斗嗚呼哀哉尚饗

祭王亭伯二兄文

嗚呼昔歲戊子擔笈仁里子來惠顧託好伊始時奉常
公抱病牀第晨昏之奉與仲臥起外應賓朋公聞色喜
迨於大故瘁不勝毀予賈不售都門留宿冬孟來旋緇
塵滿袖匪人我嗤亦自知陋子獨見憐書來幣侑期以
明春切磋相究不謂頑鄙乃同味臭既獲周旋弟晁後

先自春徂秋，咿唔牕間，舐筆伸紙，競吐其妍，當其會心，或丹或鉛，佐之酒，有寶旨，且鮮我醉歌呼，顧子塊然，謂我嗜古，發其藏，弄商敦，周彝，罇罍，黼黻，晉唐以來圖書，之譜，心開目明，得所未睹，子遊金閭，邀與徜徉，我止於栖子臥，其傍，歡然笑語，此樂難量，何圖未幾，二豎膏肓，我始怪子善病，少康暑月，露坐揮汗，如漿，獨屏於廡，燈下相望，素秋方肅，會客中堂，子席當戶，闔扉以藏，子之文弱，難恃，醫藥猶憶病時，驚其瘦削，愀愀謂予兄毋見。

詭豈不自珍疾不可却自子訃聞心焉如焚芳蘭旣摧
其芽復芬子之遺腹今已締婚後十餘年績學綴文大
業之遂以慰子魂子今永歸先司馬原靈如有知聽我
斯言朋友之誼誓以永敦嗚呼哀哉尚饗

祭侯官陳封公文

嗚呼公昔至吳觀俗海濱其氓捐捐其士逡逡誰歟泣
之漸變囂囂公有令子實牧斯人公來之年吳人病潦
九雨一晴彌望浩浩湖水西溢禾也為藻海波蓬湧飄

忽若掃壟畝不分塍則有表民之籲哀攜幼扶老或言
厥壤邑多岡阜薄少可收尚給升斗公曰上官為民疾
首高田無濡歲不宿糗當其襄陵步仞何有一視之仁
繫我父母歡聲載塗黃童白叟公聞色喜可幸無負以
此養志豈伊瀨濬旣而適歸慨然三歎吾雖不售當得
閒散苜蓿堆盤亦足衍衍及戾課最擢為御史公笑拂
衣吾可已矣彈劾之聲播於人耳方按江右飛語驟起
姻連之故指為瘡痍旣歸里門侍奉多祉昨歲初夏公

病扶几琅琅德音脫屣塵滓嗚呼哀哉某老書生以拙
見憐先慈之喪枉奠几筵感深欲報有愚而專某也斷
斷每荷諮詢眉壽之祝賁及於親禮重鄉飲首延為賓
相與惜公綬長短汲其唯既醉五福鱗襲何圖承訃當
歲甫集逮茲永夏緘詞南檝白雲英英山幽水清風馬
雲車翱翔蓬瀛下視紛呶譬羶與腥公其唾之來舉一
觥嗚呼尚饗

祭王使君達宇先生文

維公淹雅之度包蒙鄙而能容凝定之衷當造次而不
擾其所施於從政之大者遠莫能詳而小試於育才之
日者久而彌著驟而接其色詞如坐春風如飲醇醪不
覺夫體融而心醉徐而窺其蘊藉如中流楫如隕岸防
祗見其氣定而神閒凡皆吾黨之得於親承所不能僂
指數而可以一二見其槩者也當公之未去下邑也會
多士之郡試或召侮而衆囂此於法為犯上曰某某其
煽搖謂曖昧之難明告當事以密調與其濫而枉誣無

寧幸而獲徽向微仁人之一言豈無誤註於科條及公之登第春官也有錢虜之通神嘗誣殺以中士獄久淹而未決曾莫分於臧否值督學之來涖潛賄屬乎胥史坐緣事以遞降復數年而得理儻師帥其如公何鼠輩得而為市夫此二者前有恃則幸無濫後失庇則旋見傷兩生蓋得於傍觀嘗私論其所以而今日之所為痛悼於哲人也自公入官興鳩出守閩粵中間雖書問濶踈然而賢嗣之哀然於京兆元孫之斐然於黌校皆竊

以驗積善之多慶宜福未有艾也何圖一疾而解官涉期而承訃用未盡其才德未食其報豈天人之際容未盡符而修短之數或果前定耶所媿壤地相隔僅百里而遙而匍匐往救顧獨後於知交生芻告誠俄已迫於窀穸蓋兩生之困頓哀遲實抱大慙於中而庶幾冥漠之我鑒者恃有平日之知也猶記癸卯之冬合餞之夜公醉傀俄不辭杯斝欲別誠難酒盡須貫猶昨日耳忽此徂謝陳詞侑觴有淚如瀉嗚呼哀哉

祭王編修辰玉文

嗚呼士驚於華靡有根芟剪刻繒綵綴之枯槁我思古
人求友於今洵美君子實慰我心含咀仁義周孔為師
根之沃矣播厥芳蕤其遇之晚柅於多口疑者漸信璞
玉斯剖其登於朝有文恢奇不踳而走罔敢瑕疵其歸
就養穆焉孝誠將老其才以為國楨其疾之痼而卒以
天天可問耶行道有標君之無年民之無祿何予之豐
而奪之速父哭愛子子失慈父抑又何言私門之監仲

尼大聖不諧其仇非我所為其又奚愴孟軻之賢臧氏
興讒彼嚙嗜者豈足為嫌又其甚者爭名若僧射影吹
毛詫棘為檜世道交喪末流日壯孰恥不為欲以身郭
嗚呼自予獲交於今世年惟是朴直君則我憐千里之
思促膝之談旬月之別信宿之淹相見而笑臨分而懊
中間興懷筆豈能道予窮於世實駕且慵君欲振之若
于其躬每辭京尹輒為慨然惜也斯人逢掖華顛況艱
子嗣及哀猶獨盍廣其途屢勤書牘予謝不可君譙且

疑已聞生男喜而色飛嗚呼朋友道喪貌而不衷獨君
於我戚欣與同君之抱病有加無瘳凡我家人咸為之
憂日夕以興如秋旱苗數日闕問顧我忉忉訃至之夕
我泗沅瀾攪涕還坐相對辛酸雖吾痛君婦女莫知道
義之戚豈忘吾私臨歿之音似託以子有如不盡生者
媿死往奠一觴侑惟蔬果詞以告哀庶其來安嗚呼哀
哉尚饗

又

嗚呼君之雄文博學蒐六藝而總百家始冠秋賦於京
兆或混玉石而羣譁洎乎韋相告老元成起家擢南宮
而脫穎對大廷以揚葩於是向之懷疑久乃帖服化猜
忌而為咨嗟君之篤行坦中友一鄉而論千古不知者
以為矯矯華胄矜才諳而峻城府知之者以為溫溫恭
人劑柔剛而泯茹吐若其居常心口相勞嘿然深念趨
然圖報一則曰父母老矣門地之高其何可恃蓋兢兢
乎爰始於客位之醮再則曰恩寵極矣如天之施其何

可忘蓋勉勉焉自勗以移忠之孝此雖朝夕伊邇莫能
識夫中之所存而庶幾於莫逆者於君之亡每不勝夫
國寶之悼然則世之惜君徒以才與時迂名由晚成年
弗克永道未獲亨與哲人之不試而同慨而孰知深衷
之怫怫即號為能知之者視夫羣猜聚訟之徒要未足
為徑庭也某等始終之誼祇以文行相關周旋術藝之
數高論皇王以還有骯髒而契合孰脂韋以躋攀君既
捐我各已衰頽淚未乾於宿草魄未奠於西山青烏之

書誕謾而不可信君未即葬懼夫言之或中而以曹曹者貽後之患然乎否耶松檜蒼蒼流水灣灣其必從先公先夫人以徜徉於其間耶踞陳詞而薦酒神髣髴兮左右嗚呼尚饗

又

嗚呼自君之歿於今十有八年矣而骨肉始歸於土非緩也當文肅公遷殯而西凡知君者咸謂孝思之依依何異生存之處華屋如必別為之兆域非所以慰之於

冥冥也因遂從公之柩而西於馬聆山寺之曉鐘覺塵
寰之宵夢或從公而生天或踵前之芳躅儻可臆決於
冥冥乎而青烏之書不無異同則遲迴而未果固人子
之至情耳暨乎歲月屢經疑懷漸豁蓋嘗始基於西山
之崇峻已復穆卜於東渚之渟泓纍纍焉依先世之故
域鬱鬱乎啓今日之新阡庶孝誠之積虔禱而有符即
明靈之託蛻骨而永安者矣予與君投分實深有懷欲
吐昔嘗濡翰託之陳饋文蓋四言韻逾五十亦既憑悽

惻之音寫痛悼之懷矣別又賦五言律十首慨世道之
交喪寄懷思於無窮焉迨乎遷座而西邁復有輓歌以
導行凡七言二韻十首則皆導之以逍遙而極之於無
生即欲別為之詞其亦何加於此頃辱賢嗣請為君傳
文不求工意在徵實與於執紼亦復何言猶憶辛丑北
歸枉奠先子喜予得雄盍出以視撫而見語當有難弟
未幾而殤始悟君指比舉復聞君疾憑几聞之欣然此
乃賢嗣豈有術耶不爽如是予今送君歸安窀穸輒吐

所知以訓夙昔君家尚寶朗朗英特孫以出之有容無
窄使於四方所至前席曰是寧馨足徵世澤里閭稱之
無間疏戚前史之耽既披且繹門內雍雍庭前翼翼孫
枝蘭玉伸其佔畢以是慰君匪聞而覲如君超超已通
仙籍凡予所陳爰告無斁嗚呼尚饗

祭叅政張公文

嗚呼人或謂公吐濁吸清形羸神王胡不百齡公嘗語
我順受其正較短與長乃俗之情予昔善病頗學養生

既而大寤孰為殤彭所貴聞道空無所縈心之已了又
安問形相視而笑如日銷冰今之哭公有叩莫應嗚呼
哀哉士窮而老絕意榮名時復感慨水火妄爭豈少庸
駑為國股肱如公清真不至公卿始為州牧追叅藩屏
歷試中外慎獄與刑所見於世藹乎仁聲不激不隨以
廉自程人飲其和莫識舩稜意所鄙薄狗苟蠅營不露
色辭默焉內懲萬石之慎三閭之醒永以詒穀施及孫
曾尤敦儉素代綺以糴食不兼味矧於珎烹自乞終養

恃母猶嬰後園之遊親從以錫蓋踰一紀爰啓先塋頃
方禪除欣接友朋讌樂以酒屢及深更獨居高樓遊目
郊垌布衣徒步或攜野僧彼不能識問此孰僉俄而鼓
盆悲不自勝火災痰壅失其所馮曾未兩月溘然相仍
死生旦暮非公所驚將從羽流翱翔玉京抑生人天歸
依佛乘公既厭世詎有不能雲鏃翠輶恍其將迎公乎
歸來一釂予觥嗚呼尚饗

祭張烈愍文

嗚呼昨歲凶問至吳吾黨相顧驚愕愴悼相與痛其所
遭而壯其守死以謂斯人之端靜愿恪宜可圖於遠大
而乃死於盜耶豈天遠不可問而人事每紛出於適然
都不足憑而弔耶嘗試以季脩之才之行而論其平生
所遭天固厚之矣其又孰為之撓耶君少工文辭為儕
輩所推讓追踰壯而僅獲升於學徒見賞於國子先生
而曾不得比於遭時之俊造况乃履方蹈軌穆乎其度
肅乎其容有為之推莫為之媚而僅以牧凋瘵於遐方

又求於選人之常調涖官三年其民戴之為慈父其士
奉之為人師而同官皆稱為不矜不伐之君子又嘗兼
領鄰邑所至皆頌其惠慈比死官而相率肖像祀之於
廟若斯人者其文其行其吏治亦既為當世所稱矣始
而屢躋於棘闥猶曰未遇其人也及乎受官於荒裔猶
曰被拘於格也至為上官所知將移治大縣使展其用
而廣其施以為寵為光而驟歿於戎燹之羣剽豈所謂
天道無親常與善人者非耶抑生之不辰或別有命焉

者將天亦弗之捺而人固莫能拗耶不然無乃用之未
盡其才需之莫遘其會非殺身成仁之是蹈終無以昭
激烈而警憤眊耶今者羣公疏請主上憫惜贈官錫諡
名滿中朝而遠播戎徼雖生前之掩抑而無窮之炳耀
何如也視夫享榮名於朝著身未歿而貽羣誚者何如
哉曾得與相較焉不也某以世講辱交君每東候仲父
或來外家旨酒清言每共歡笑尤以同因諸生數譚藝
文繼之感慨實相期於久要當君之西賦詩贈行君還

昔觀縷示我峨眉遊記屬為叙之緘報未幾而君以殉
節歿矣慙吾生之無狀徒優游以及耄悲君之遭重君
之操何異芝蘭見鋤而蕭艾是膏耶及靈輶之東還奠
一觴以抒懷髣髴乎明靈之來醺嗚呼哀哉

祭侯給諫文

嗚呼天之生才以嗣其先而昌其後譬之農勗是穠是
蓂迺宣迺畝如君茗穎點筆成文氣陵儕耦陽羨之遊
髮纔覆額已薄株守旋廩學官再試京兆其璞斯剖當

大叅公脫於縶維頗娛詩酒通家年少獲與賓筵以升
侑斗每蒙顧君捧觴而前醉以玉友自公仙去君試南
宮屢困未偶晚得一第使於四方風塵疾首梯山航海
頻年道塗蓋亦云久已擢諫垣感遇攄忠九閭是叩竟
以罷歸遽嬰沉痾纔得下壽慈母在堂養不克終豈勝
遺疚嗚呼哀哉邑之在吳瀕海而東頗為才數始宋嘉
定逮乎今日賢達多有李廸常宗鳴於興朝詞人之右
弘正以來風氣彌開不蹙而走君三鳳鵠亦既和鳴仲

不終喁伯登南宮受官而旋獲侍瀨潛叔之詞源厚積
而流昆侖之沍以是慰君歿而不亡其又何負予好為
詞未獲受砭第堪覆瓿晚而得雄以童受知僅吹劒首
羨君蘭蓀又茁其芽洵也積厚予媿非莊今之哭惠坎
其擊缶嗚呼尚饗

合祭須贈公文

嗚呼俗驚於利爭炫其僇未厭溪壑禍不踵旋或厚為
藏擬儉以慳施不及親為盜積焉孰如公恬見利不前

退亦無恐飽食安眠孰如公仁能殖能捐予以行德令
聞昭宣爰啓後人麗藻翩翩積思藝文學日貫穿公歿
未幾文戰登先再進再捷摩壘高舉乃言於朝卜塋是
虔凡受公施請為墓田既得吉卜衆口歡然祝其子孫
福澤綿延崇酒於觴實其豆籩以奠以祖匍匐華顛距
公之歿今已十年人情如此實維公賢公之懿美磐石
以鐫鬱鬱葱葱歸安新阡其後之昌福善者天吾儕視
公年或垂肩或友公子同操繫鉛自頃承役各有所專

傷時偷薄為公涕連陳詞酌酒告于几筵嗚呼公乎庶
幾得全尚饗

祭沈廷和員外文

嗚呼萬厯之季歲在作噩予哭伯兄迄今廿年君官郎
署受命于廷昨歲云暮陳饋見呼晤言深更厭厭之飲
耐酒如昨有醕無停春暮為期歸自浙西偕我友朋彼
此過從歡然道故爰濯塵纓何圖南還困於風露至妨
將迎謂當勿藥醫師束手遂不能興嗚呼哀哉君素珍

攝室無內嬖以嬰錄稱甫艾服官由文學遷誨國子生
聞譽之著擢隸冢宰廉辨有聲遂陟武庫旋歌皇華傳
車是乘諭浙東西念此夙夜遽還郊垌抵家而病乍聞
延醫謂當旋平再往訊焉驟而增劇大命以傾嗚呼哀
哉予昔垂髫甫學弄筆未受排擻時廣信公傳車麟輯
還自朝正撫予而喜顧語先子氣朗神清吾之二穉一
長一少與同受經迄今追思每慙淪落中心怛怛暨乎
金玉硯席之好迭唱與賡皆託以予玉也石攻藍乎出


青君之南還季留北雍有文雲蒸諸孫濟濟已露頭角
佔畢囊螢直需時耳千里足下行且計程如君康彊尚
堪煩劇宜觀厥成厚與之福而嗇其年天固難憑抑亦
分定與角去齒造物忌盈嗚呼哀哉予之隕廢志不帥
氣慵與拙并晚而生男課之藝文晷勉筆耕督學之試
幸而甄收得試留京蔬菽之奠與于執爵世講之情嗚
呼哀哉尚饗

祭瞿翁文

嗚呼憶甫成人從我先君讀書沈氏維廣信公以疾免
歸迄於不起俗薄而囂羣聚信信族姻坐累翁沈外家
鄉人重之莫之敢指寧唯莫指片言一出衆口同是予
雖穉愚見其屹然私心為喜時翁正強其逮於今忽又
三紀習俗之壞縱有老成亦靡足恃蓋俯仰間日淪日
漓孰知底止翁今厭世翱翔寥廓脫去塵滓子孫滿前
撫曾及玄復何憾只自我不見踰一年所室遠心邇公
昔入城曾未席暖即來媿媿謂我父祖再世長厚君又

趾美云何厄窮沉復單子吾猶及歟予謝不敏實忝前
人天道邈矣每一相對凄然而別予願為泚雖老而強
食噉兼人百齡可擬不圖茲秋脾受肝刑驟減甘旨人
或負翁意不能平欲出其否曾是蚩蚩而能使悛病或
由此頃聞屬續神識恬然談笑生死殆聞道歟豈今之
人能涉涯涘翁起孤童里有長年曰避此子是當素封
以好行德稱於邑里斯言果酬富壽且康高有福祉跡
其為人質直以方不為骹骹我獻其誠爾破其械以是

沒齒昔長邑賦數役於官前後見禮每條便宜詳厥可
否以芘桑梓天之報翁在翁後人其無窳品予有女甥
歸於曾孫夙夜滯瀟亦既抱子慰之目前庶幾葛藟四
世之交哀年之感寄此哀誄嗚呼尚饗



學古緒言卷十五